

PELITA BRUNEI



AKHBAR RASMI KERAJAAN NEGERI BRUNEI
DI-TERBITKAN PADA TIAP2 HARI RABU

TAHUN 12 BILANGAN 50 RABU 13 DISEMBER, 1967

دابو 11 رمضان 1387

PERCHUMA

D.Y.M.M. gembira tentang kemajuan negara yang di-laksanakan terus

BANDAR BRUNEI. — Duli Yang Maha Mulia Paduka Seri Sultan Hassanal Bolkiah telah bertitah bahawa Kerajaan ada-lah bertujuan untuk memelihara kedudukan kewangan yang tegoh di-samping menumpukan sa-bilangan besar hasil2 negeri kapada kemajuan yang munafaat.

Kerajaan, titah baginda, ada-lah penoh menyadari betapa mustahak-nya perkembangan dalam lapangan2 pelajaran, masharakat dan kebudayaan yang kemajuan dalam lapangan2 itu sedang berkembang dan terus berjalan.

Baginda bertitah demikian ketika merasmikan pembukaan persidangan Majlis Mashuarat Negeri (Belanjawan) yang berlangsung di-Dewan Kemasharakatan, Bandar Brunei pada 11 Disember, 1967, hari Isnin lepas.

Duli Yang Teramat Mulia Paduka Seri Begawan telah juga menghadiri istiadat pembukaan rasmi itu di-samping Yang Teramat Mulia Duli2 Wazir, Yang Amat Mulia Cheteria, Pegawai2 Kanan Kerajaan, Ketua2 Pejabat dan ahli2 majlis2 mashuarat serta orang ramai.

Duli Yang Maha Mulia Paduka Seri Sultan telah menyatakan rasa kegembiraan Baginda atas kemajuan2 yang tercapai dalam bidang pelajaran dan perkembangan dimana Baginda sendiri telah berpeluang merasmikan pembukaan Bekalan Tenaga Lelek Negara baharu2 ini.

BERJAGA2

Bertitah mengenai persidangan yang berthabit dengan belanjawan negara itu, Baginda telah menyatakan keyakinan kepada ahli2 majlis mashuarat negeri itu supaya akan meningkatkan dengan amat teliti2 anggaran2 hasil dan perbelanjaan bagi tahun yang akan datang.

Sa-lain dari itu, Baginda telah menyatakan keshukoran atas terkawal-nya keamanan dan ketenteraman yang raayat Brunei telah menekmati kebebasan dari kekachauan dalam negeri.

Bagaimana pun, titah baginda, keadaan di-negeri2 tetangga memerlukan kita supaya sentiasa berjaga2 untuk memelihara keamanan dan ketenteraman ini dalam negara.



Duli Yang Maha Mulia Paduka Seri Sultan sedang membalaq tabek kehormatan dari pasukan Pulis Di-Raja dari sa-buah pentas di-hadapan bangunan Dewan Kemasharakatan sa-belum Baginda merasmikan pembukaan sidang tersebut.

Baginda telah menitahkan uchapan terima kaseh kapada pasukan Pulis Di-Raja serta Askar Melayu Di-Raja Brunei dan juga kapada pasokan2 tentera Baginda Queen yang telah bekerjasama amat rapatnya untuk mengawal keamanan dan ketenteraman negeri ini.

Duli Yang Maha Mulia Paduka Seri Sultan berdo'a mudah2an seluroh raayat Baginda akan terus menerus tinggal dalam aman dan damai.

Kapada Ahli2 Yang Berhormat bagi Majlis Mashuarat

Negeri itu, Baginda telah bertitah bahawa ahli2 majlis itu ada-lah mempunyai tanggong-jawab2 yang amat besar terhadap kebijikan, keamanan dan ketenteraman Negara Brunei.

Baginda menyeru ahli2 majlis supaya dengan sungoh2 dan laila ikhlas untuk menjelaskan supaya raayat faham akan apa yang Kerajaan sedang dan akan usaha-kan untuk meninggikan laila taraf hidup mereka laila se-derhana ka-arah kebijikan.

LIHAT MUKA 8



Duli Yang Maha Mulia Paduka Seri Sultan (tengah) bergambar ramai dengan ahli2 Majlis Mashuarat Negeri di-depan bangunan Dewan Kemasharakatan sa-lepas pembukaan sidang belanjawan pada hari Isnin lepas. Kelebihan dalam gambar ini ia-lah Duli Yang Teramat Mulia Paduka Seri Begawan (No.5 dari kanan) dan Yang Teramat Mulia Duli2 Wazir.

Pembinaan Mahligai menelan belanja \$500,000.00

Lambang hasrat
Kerajaan pada
mengembangkan
Ugama rasmi
negara

BANDAR BRUNEI. — Mahligai yang merupakan bahtera Di-Raja, di-bena sa-bagai satu kenangan kekal kerana menyambut Nuzul A-Kor'an yang ka-1,400 tahun telah pun siap pembinaan-nya.

Sa-orang juruchakap Jabatan Hal-Ehwal Ugama berkata, ia-nya akan di-buka dengan rasmi-nya oleh Duli Yang Maha Mulia Paduka Seri Sultan pada 19 Disember ini, ia-itu serentak dengan hari ulang tahun turun-nya kitab suchi Al-Kor'an itu.

Mahligai tersebut ada-lah melambangkan hasrat dan usaha pehak kerajaan untuk mengembangkan ugama Islam, yang menjadi ugama rasmi di-negeri ini dan bertujuan untuk menyediakan sa-buah tempat yang kekal bagi peraduan2 dan pesta yang ada kaitan-nya dengan hal2 ugama Islam.

Juruchakap itu berkata, pembinaan-nya menelan belanja \$500,000.00 termasok harga pembinaan tempat pe-nuntun dan kolam panchutan ayer.


KEPERMAIAN

Mahligai yang di-bena di atas Lagoon Masjid Omar Ali Saifuddin itu, menurut juruchakap itu, ada-lah juga menjadi salah satu sumber kepermaian kapada Bandar Brunei.

Sa-telah pembukaan-nya pada 19 Disember, ia-nya akan merupakan tempat bagi mengadakan beberapa achara untuk menyambut hari ulang tahun Nuzul Al-Kor'an, seperti pertandingan memba'cha Kor'an dan membacha sajak.

Satu perarakan tanglong dan berchuchol rumah2 salama tiga malam juga akan di-adakan dalam sambutan itu. Hari Nuzul Al-Kor'an juga akan di-peringati dengan penjualan setem2 khas pada 19 Disember ini.

Kemuncak bagi sambutan Nuzul Al-Kor'an itu akan berlangsung dari 19 hingga 26 Disember, 1967. Di-sepanjang sambutan itu di-adakan berbagai2 achara peraduan2 peringkat negeri akan di-langsongkan.



Gambar di-atas menunjukkan Mahligai yang merupakan bahtera Di-Raja yang di-bena di-Lagoon Masjid Omar Ali Saifuddin. Ia-nya ia-lah kenangan kekal untuk memperingati Nuzul Al-Kor'an yang ka-1,400 tahun dan tempat mengadakan peraduan2 dan pesta yang berkaitan dengan ugama Islam.

16 JAMBATAN YG. PANJANG-NYA 4,443 KAKI AKAN DI-BENA DI-KG. AYER

BANDAR BRUNEI. — Pejabat Daerah Brunei dan Muara telah memberi kuasa kapada Jabatan Kerja Raya untuk membina 16 buah jambatan yang panjang-nya berjumlah 4,443 kaki di-Kampong Ayer.

Jabatan2 tersebut akan menghubungkan antara sa-buah kampong dengan sa-buah kampong yang lain di-Kampong Ayer dan memberikan kemudahan jalan keluar masuk kapada orang2 kampong tanpa menggunakan perahu atau moto bot.

Sa-orang juruchakap Pejabat Daerah itu berkata, jambatan yang paling panjang se-kali ia-lah 820 kaki. Ia-nya akan menghubungkan antara Kampong Sungai Kedayan 'B'

dengan tambak Lagoon Masjid Omar Ali Saifuddin.

Juruchakap itu berkata, peruntukan kerana itu telah pun di-sediakan dan kerja2 pembinaan-nya akan di-laksanakan oleh Jabatan Kerja Raya pada tahun depan.

Sa-tengah dari jambatan2 itu akan merupakan tambahan kapada jambatan2 yang ada sa-bagai jambatan untuk pe-nempatan paip2 bekalan ayer ka-Kampong Ayer.

Juruchakap itu berkata, apabila jambatan2 tersebut siap, kebanyakan dari kampong2 dekat dengan bandar akan di-hubungkan ka-tebing dengan jambatan.

Orang2 kampong juga akan menekmati bekalan ayer melalui jambatan2 tersebut.

JALAN RAYA LUAR BANDAR BRUNEI DI-BUBOH BATU KELIKIR

BANDAR BRUNEI. — Jalan raya luar bandar di-Daerah Brunei dan Muara akan di-perbaiki dengan di-buboh batu kelikir di-atas-nya untuk membolehkan-nya di-gunakan dalam segala chuacha.

Jalan2 raya di-luar bandar ada-lah di-bena oleh Pejabat Daerah di-bawah ranchangan perkembangan luar bandar.

Sa-orang juruchakap bagi Pejabat Daerah berkata, batu kelikir telah di-jumpai dekat Muara dan kerja mengambil batu itu akan di-mulakan da-

lam bulan hadapan.

Juruchakap itu berkata, tempat batu itu di-pileh khas untuk membekalkan batu kelikir bagi memperbaiki jalan2 raya luar bandar di-Daerah Brunei dan Muara.

Kerja2 untuk membuboh batu di-atas permukaan jalan2 raya luar bandar sekarang ini telah di-mulakan di-Kiulap dan Kiarong.

Kerja2 itu akan di-perhebatkan apabila quarry di-Muara itu nanti mengeluarkan hasil.

"MEKAR" SUDAH TERBIT

BANDAR BRUNEI. — Pengarah Dewan Bahasa dan Pustaka telah mengumumkan bahawa dewan itu telah menerbitkan majalah kanak2 yang di-beri nama 'Mekar'.

Majalah itu berharga 60 sen sa-naskah dan boleh di-beli di-mana2 kedai buku di-Brunei.

'Mekar' di-hiasi penoh dengan gambar2 mengenai sains, pengetahuan am, sejarah, cherpin dan lain2 bacaan kanak2.

Ia-nya ia-lah majalah yang ketiga di-keluarkan oleh dewan itu sa-lepas 'Berita' dan 'Bahana'.

63 1/2 BATU JALAN TAMBAHAN DI-TUTONG

TUTONG. — Satu rangkaian jalan raya tambahan sa-jauh 63½ batu telah pun di-chadangkan bagi Daerah Tutong, di-bawah ranchangan membina jalan2 baru sa-jauh 140 batu di-seluroh negeri.

Apabila rangkaian jalan raya tambahan itu di-luluskan oleh pehak kerajaan maka ia-nya mem-buka kawasan2 luar bandar dan akan menghubungkan kampong2 di-daerah itu.

Ia-nya akan melalui Litad dan dari situ jalan raya akan terus di-hubungkan ka-Kuala Belait me-lalui jalan Sungai Liang/Labi.

Kerajaan beri penjelasan mengenai usol2 yang di-luluskan oleh M.M.D.

TUTONG. — Kerajaan telah memberikan jawapan2 dan ulasan2 mengenai usol2 yang telah di-luluskan oleh Majlis Mashuarat Daerah Tutong yang bersidang pada 6 April, 6 Mei dan 7 Jun, 1967.

Dalam persidangan 6 April, 1967 dua usol telah di-luluskan bagi mengadakan tempat X-Ray badan di-rumah sakit Daerah Tutong dan bagi mengadakan bekalan letrik kampung2 luar bandar dalam daerah itu.

Dalam jawapan Kerajaan yang di-bentangkan dalam Majlis Mashuarat Daerah Tutong yang terakhir bagi tahun 1967 yang di-langsungkan di-Bilek Persidangan Pejabat Daerah pada hari Khamis, 7 Disember yang lalu telah memberikan penjelasan2 yang berputatan.

Jawapan Kerajaan itu menjelaskan bahawa satu projek untuk membina sa-buah rumah sakit baru di-daerah itu telah pun di-ranchangkan dan satu kawasan tanah telah pun di-perolehi untuk ranchangan ini. Ini, sudah tentu di-pertimbangkan untuk mengadakan bilek X-Ray dalam ranchangan itu.

Mengenai bekalan letrik, jawapan Kerajaan itu menegaskan bahawa semua kampung2 di-daerah Tutong akan di-perbekalkan dengan letrik mengikut dan apabila di-fikirkan patut di-adakan.

Dua usol yang kemukakan dalam persidangan 6 Mei, 1967 itu telah meminta Kerajaan supaya dapat membuboh pit halus (Hot-mix) dari simpang jalan raya Tutong/Seria ka-Danau dan satu usol lagi meminta Jabatan Hal-Ehwal Ugama supaya dapat mengadakan kenderaan kapada murid2 sekolah ugama luar bandar bagi darjah VI yang sedang belajar di-Sekolah Muda Hashim, Tutong.

Menjawab usol pertama itu, Kerajaan telah menjelaskan bahawa oleh kerana banyak jalan2 raya yang berkehendakkan pit halus (hot-mix) ini, maka Kerajaan sa-b e l u m membuat satu langkah itu haruslah melihat kapada keadaan dan ranchangan untuk menaborkan pit halus pada jalan raya Tutong/Seria ka-Danau itu ada-lah dalam pertimbangan.

Mengenai usol kedua puluh, kerajaan menjawab bahawa perkara mengadakan kenderaan kapada murid2 sekolah Ugama luar bandar bagi darjah VI yang sedang belajar di-Sekolah Ugama Muda Hashim itu maseh dalam per-

Tutong

Dalam sidang-nya
pada 6 April.
6 Mei, dan
7 Jun, 1967

timbang dan perhatian jabatan yang berkenaan.

Usol tunggal yang di-kemukakan dalam persidangan 7 Jun, 1967 telah meminta Jabatan Pelajaran supaya dapat mengadakan kenderaan untuk mengangkat murid2 sekolah Inggeris yang belajar di-Sekolah Melayu Muda Hashim yang datang dari Ulu Sungai Tutong sama ada dengan kenderaan darat atau sungai mengikut keadaan tempat2 itu.

Jawapan mengenai usol tersebut, Kerajan telah menegaskan bahawa pada masa ini tidak ada ranchangan bagi mengadakan kenderaan untuk kanak2 dari Ulu Sungai Tutong yang bersekolah di-Klas2 persediaan Sekolah Melayu Muda Hashim, Tutong.

"Meski pun demikian, kanak2 yang tinggal lebih dari tiga batu daripada sekolah akan terus menerima alaon sara hidup", tegas jawapan Kerajaan itu.

Selanjutnya, jawapan Kerajaan itu menyatakan bahawa kerja2 akan di-mulakan dengan segera untuk membina sekolah Inggeris di-Tutong. Ranchangan ini termasuk asrama tempat tinggal untuk 200 orang murid lelaki dan 2 orang murid perempuan. Tempat tinggal itu ada kemungkinan boleh di-gunakan pada awal tahun 1969.

Dalam persidangan itu juga, ahli dari kawasan Tanjong Maya Yang Berhormat, Awang Md. Zain bin Serudin telah mengemukakan soalan2 bertulis berhabit dengan Mukim Konsol Daerah Tutong. Beliau ingin tahu tentang mengapa Mukim Konsol itu tidak mengadakan persidangan-nya adakah tidak memberi munafaat kepada Kerajaan dan orang ramai dan adakah badan tersebut akan di-bubarkan.

Untuk menghuraikan keraguan ahli itu, Kerajaan telah menjawab bahawa Mukim

LIHAT MUKA 6

**MBBB ANJORKAN
LUMBA BASIKAL
DARI K.B.**

KA-BANDAR BRUNEI

BANDAR BRUNEI.—Majlis Belia Bandar Brunei merancang akan mengadakan satu perlumba basikal dari Kuala Belait ka-Bandar Brunei pada satu masa sa-lepas chuti Hari Raya Puasa.


Perlumbaan jarak 67 batu itu ada-lah buat pertama kali di-anjorkan oleh majlis itu dan ia-nya terbuka kapada orang2 dewasa sa-chara persaorangan dan kumpulan.

Sa-orang juruchakap bagi Majlis Belia berkata, perlumbaan itu di-ranchangkan untuk menguji kekuatan tenaga ahli2 pelumba basikal Brunei.

Kata-nya, Brunei berharap akan menghantar perwakilan ka-Sokan Asia di-masa depan untuk mengambil bahagian dalam perlumbaan basikal.

Jurucnacak itu meminta bakaI peserta yang akan memasuki perlumbaan sa-jauh 67 batu itu supaya memulakan latihan mereka.

Tarikh perlumbaan akan diumumkan kelak.



BANDAR BRUNEI. — Kerja memasang mural atau lukisan dinding di-muka depan bangunan Dewan Bahasa dan Pustaka telah selesai.

Lukisan dinding itu di-buat daripada kepingan kacha yang berwarna warni.

Pengarah Dewan Bahasa dan Pustaka, Yang Berhormat Dato Seri Laila Jasa Haji

Awang Jamil bin Pehin Udina Khatib Haji Umar berkata lukisan itu telah di-tempah dari sa-buah sharikat di-Itali.

Ia-nya di-buat berdasarkan lukisan oleh Awangku Asmalaee bin Pengiran Ahmad, seorang pegawai Dewan Bahasa dan Pustaka, Brunei dan sekarang ini beliau sedang melanjutkan pelajaran-nya dalam

seni lukis di-United Kingdom. Sa-buah buku yang terbuka dan sa-buah roda dari tengah2 dasar lukisan itu menggambarkan seni, kebudayaan, pelajaran, permainan dan perusahaan Brunei.

Gambar atas menunjukkan lukisan dinding itu telah siap di-pasang di-dinding hadapan DBP.

13 Disember, 1967.

PERKEMBANGAN SEMAKIN PESAT

HARI Isnin lepas, 11 Disember, 1967, maka berlangsunglah Persidangan Majlis Masyarakat Negeri mengenai belanjawan negara yang membinchangkan tentang perbelanjaan2 yang harus di-belanjakan Brunei pada tahun 1968 yang hanya tinggal salama 18 hari saja lagi dari hari ini bagi mendapatkan tahun baru itu.

Dalam persidangan hari pertama itu telah di-dahulukan untuk di-bentangkan kepada majlis satu Rang Undang2 Perbekalan bagi tahun 1968.

Dalam Rang Undang2 itu terchatah-lah anggaran perbelanjaan kerana perkhidmatan tahun 1968 yang jumlah besar-nya lebih dari \$189 juta.

Dalam peruntukan kerana perkhidmatan tahun 1967 hanya berjumlah sa-banyak \$148 juta yang berma/ana peruntukan tahun 1968 ini ada-lah bertambah sa-banyak \$41 juta.

Sechara kasar, maka da-pat-lah di-ukur bawaha tahun 1968 ada-lah merupakan tahun yang akan mendekatkan lagi negara Brunei untuk di-kenal sa-bagai sa-buah negara yang menuju ka-arah perkembangan yang semakin besar dan meluas yang menjadi hasrat Kerajaan Duli Yang Maha Mulia Paduka Seri Sultan.


Jika di-tinjau dari sudut angka, angka \$41 juta itu juga merupakan suatu angka yang besar, dan mempunyai suatu kuasa hasrat yang tinggi nilai-nya dan besar faedah-nya untuk Brunei dan raayat di-dalam-nya menuju ka-ambang kemajuan yang amat meyakinkan.

Dalam titah uchapan ketika merasmikan pembukaan persidangan itu, Duli Yang Maha Mulia Paduka Seri Sultan telah menumpukan kapada empat perkara penting ia-itu pertama mengenai kemajuan, Uagma, Kewangan dan keamanan negara yang keempat2 perkara itu meliputi seluruh bidang dan jurusan di-negara kita ini.

Baginda merasa gembira yang Kerajaan telah terus menerus melaksanakan ran-changan2 kemajuan pelajaran dan lain2 perkembangan lagi yang mana Baginda sendiri yang baru saja beberapa bulan menaiki takhta Kerajaan telah berpeluang meng-isti-harkan pembukaan Perbekalan Letrik Negara ia-itu salah satu ranchangan yang besar.

Kerajaan menyedari sa-penoh-nya betapa mustahak-nya perkembangan dalam berbagai2 lapangan seperti pelajaran, masharakat dan kebudayaan. Kerajaan bertujuan untuk memelihara ke-wangan yang tegoh sa-bagaimana tahun2 yang lalu dan Kerajaan juga menumpukan sa-bilangan besar hasil2 negara untuk melancharkan projek2 kemajuan yang mem-beri munafaat atau faedah kapada raayat dan negara.

KHUTBAH JUMA'AT:



Bulan Ramadhan satukan kaum muslimin dengan tidak membezakan warna kulit

Ibadat puasa bukan suatu perintah yang menyusahkan umat Islam

KEDATANGAN bulan Ramadhan yang kita di-wajibkan berpuasa bagi menjunjong salah satu rukun Islam ada-lah sebagai alat bagi menyatukan kaum Muslimin seluroh-nya, baik di-Barat mahu pun di-Timor dengan tidak menghiraukan perbedaan warna kulit dan lain2.

Bulan Ramadhan ini menyatukan kaum uMuslimin dalam kegembiraan dan perasaan mereka, menyatukan mereka dalam memperingati kembali kenangan2 yang indah berhubung dengan sejarah, menyatukan waktu makan dan minum mereka. Bulan Ramadhan ini juga menjadikan orang2 miskin dan orang2 kaya dalam kedudukan yang sama ketika menuaikan fardu Puasa.

MENGAWAL HAWA NAFSU

Dalam bulan Ramadhan ini kaum Muslimin yang menuaikan puasa itu merasa diri mereka sa-olah2 mereka itu bangun dari tidor di-luar waktu kebiasan mereka, kerana mereka pada sepanjang hari me-nahan diri daripada makan dan minum memelihara serta mengawal hawa nafsu semata2 menjunjong perintah Allah yang di-durong oleh hati yang penoh dengan iman dan takwa serta mengharapkan ganjaran atau pahala daripada tuhan yang maha kuasa. Dalam keadaan ini kaum Muslimin se-luroh-nya bersatu, dan tiada perbezaan yang timbul disebabkan oleh kekayaan, pangkat, warna kulit dan lain2 lagi. Semuga kaum Muslimin

yang berpuasa dengan penoh keimanannya mendapat rahmat serta tafik dan hidayah dari-pada Tuhan.

Ibadat berpuasa bukan-lah suatu perintah yang memberatkan atau menyusahkan orang2 Islam, bahkan salah satu dari-pada dasar perundangan dalam Islam ia-lah perintah2 itu ada-lah sesuai dengan keadaan semula jadi manusia dan Tuhan tidak-lah bermaksud untuk menyusahkan orang2 yang beriman kepada-nya, bahkan keriangan dan kelungan menjadi maksud dalam perintah2 ugama-nya.

UZOR

Dalam menjalakan ibadat puasa orang2 yang uzor dari segi pandangan shara di-haruskan berbuka puasa ke-mudian di-ikuti dengan Khadza di-masa lain atau membayar pediah. Kelungaran atau keriangan itu berdasarkan perintah Tohan dalam surat Albakrah ayat 185 yang bermaksud:

“Allah menghendaki supaya kamu mudah dan tidak meng-hendaki supaya kamu susah”.

Orang2 yang di-haruskan berbuka puasa ia-lah orang sakit, orang terlalu tua tidak berdaya mengerjakan puasa, orang musafir baik belayar bukan kerana tujuan maasiat, perempuan yang hamil atau yang sedang menyusukan anak.

Orang2 yang di-haruskan berbuka puasa itu, ada kala-nya mengkhada sahaja, ada

kala-nya wajib kadha serta membayar pediah (tebusan) ia-itu dengan mengeluarkan kira2 satu kati beras dan ada kala-nya wajib pediah sahaja.

ORANG TUA

Orang2 yang wajib khada sahaja ia-lah orang sakit, orang musafir, perempuan ha-mil atau sedang menyusukan anak jika takut diri-nya Muzrat. Orang2 yang wajib khada serta pediah ia-lah perempuan hamil atau sedang menyusu-kan anak dan ia takut diri anak-nya itu muzrat, orang yang melambatkan khada Ra-madhan hingga datang Ra-madhan yang lain. Dan orang2 yang wajib pediah sahaja ia-lah orang yang terlalu tua dan orang sakit yang tidak ada harapan semboh.

WAJIB

Ini-lah kelungaran2 dan ke-ringinan2 dalam Ugama Is-lam ketika kaum Muslimin menunaikan fardzu Puasa, se-benar-nya Puasa ‘bukan-lah perkara yang senang dalam sejarah umat manusia kerana bukan sahaja umat Islam yang di-wajibkan berpuasa bahkan agama2 lain yang terdahulu daripada-nya telah mewajib-kan puasa kapada pengikut2-nya.

Mari-lah kita menunaikan ibadat berpuasa dengan hati yang penoh keimanannya dan takwa serta menjunjong pahala daripada Tohan yang maha Esa dan semua kita menjadi orang yang takwa.

Ranchangan baja perchuma 1,508 karong baja padi di-bahagi2kan kapada peladang2

BANDAR BRUNEI. — Pengarah Pertanian, Awang K. G. Malet berkata lebih dari 300 orang peladang telah mempergunakan ranchangan bantuan baja padi yang di-umumkan oleh kerajaan dalam bulan Ogos tahun ini.

Beliau berkata, sa-takat ini 1,508 karong baja telah dibahagi2kan kapada peladang2.

Hanya peladang2 yang mempunyai sawah padi dimana terdapat ada tali ayer dan parit telah di-berikan baja dalam musim ini.

Awang Malet berkata, kerajaan berharap akan dapat meluaskan ranchangan bantuan baja padi ini di-masa depan jika lain2 kawasan di-dapati sesuai.

Kira2 1,121 gantang benih padi yang boleh mengeluarkan hasil yang banyak telah di-keluarkan kapada peladang2 dalam tahun ini untuk menambahkan lagi bekalan2 benih padi jenis IR8 ini. Padi Malinja dan Masuri sekiranya sedang di-tanam di-pusat2 pertanian Kilanas, Lumapas dan Luahan.

Awang Malet berkata, hingga sekarang tidak terdapat sa-


barang gangguan atau penyakit terhadap padi, tetapi belalang telah mengganggu di-beberapa kawasan dan di-empat buah buah kampung tikus di-beritakan telah melakukan banyak kerosakan terhadap padi.

Satu masa'alah yang di-hadapi dalam usaha hendak menambahkan hasil padi bagi satu ekar ia-lah kerana adanya sa-chara meluas kebiasaan menanam padi di atas tanah gambut dan tanah pasir.

Kedua2 jenis tanah ini menghadkan hasil yang dapat di-perolehi dan di-lain2 bahagian dunia tanah gambut di-dapati tidak sesuai untuk penjualan beras jangka panjang yang boleh menguntungkan.

Awang Malet menjelaskan, gulongan tanah itu dapat diketahui apabila pengkajian kebolehan tanah yang di-jangka di-mulakan tidak berapa lama lagi selesai di-jalankan.

Tujuan ranchangan bantuan baja itu ia-lah untuk menchuba dan menulung menambahkan pengeluaran beras di-negeri ini yang dalam tahun lepas telah mengimpot lapan puluh peratus dari jumlah beras yang di-perlukan.



Menjelang berbuka puasa umat Islam kelihatan sebok membeli belah menurut keperluan selera masing2. Gambar atas menunjukkan penjaja 'chindul' sebok melayani pembeli2-nya.

BELUM ADA ORANG YANG DI-TANGKAP KERANA TIDAK BERPUASA

yang tidak berpuasa.

Sepanjang bulan puasa, umat Islam di-larang makan, minum atau merokok di-sepanjang siang hari, dari fajar hingga matahari masuk.

Sa-orang Islam yang tidak berpuasa boleh di-denda sambanyak \$50 kerana kesalahan pertama, \$75 bagi kesalahan kedua dan \$100 bagi kesalahan kali ketiga.

Juruchakap itu memohon tuan2 punya restoran dan kedai2 makan supaya memberikan kerjasama dengan tidak menjual minuman atau makanan kapada orang2 Islam sepanjang siang hari.

Tuan2 punya restoran atau kedai2 makan boleh di-denda jika mereka di-dapati bersalah kerana melayan orang2 Islam di-sepanjang siang hari pada bulan Puasa ini.

TABONG DERMA HARI RAYA

BANDAR BRUNEI. — Jawatankuasa tetap untuk memungut derma hadiah2 Hari Raya bagi anak2 yatim, orang salah dan orang2 sakit di-rumah sakit telah menyibarkan senarai2 memungut derma

Jawatankuasa sa-ramai 23 orang itu telah bertugas sejak tahun 1958 dan pengurusinya pada masa ini ia-lah Pengetua Pegawai Hal-Ehwal Ugama, Pengiran Muda Dato Seri Laila Jasa Kemaluddin.

Pada tahun lalu, jawatankuasa tersebut berjaya memungut derma berjumlah \$12,197.12.

Wang derma itu telah digunakan untuk membeli hadiah2 dan makanan bagi orang2 salah dan orang2 sakit serta anak2 yatim yang juga menerima wang sa-banyak \$5 bagi tiap2 sa-orang.

Sa-orang juruchakap jawatankuasa itu berkata, jawatankuasa tersebut berharap akan

dapat mengumpulkan sa-jumlah derma yang lebih besar pada tahun ini.

Sa-lain senarai2 derma itu, jawatankuasa tetap itu telah juga meletakkan tabong2 derma di-masjid2 dan surau2 di-seluruh negeri.

Jawatankuasa itu juga ber-chadang hendak mengadakan pertunjukan wayang gambar, pementasan dan menjual pelek2 kereta guna menambahkan wang bagi tabong derma Hari Raya itu.

TELAGA MINYAK AKAN DI-KOREK DI-SATU KAWASAN DI-TUTONG

TUTONG. — Sharikat Minyak Sunray Borneo telah pun selesai menjalankan kerja2 mengesan gegaran bumi di-kawasan yang di-pajakkan kapada Perbadanan pajakkan kapada Perbadanan Penapis dan Minyak Clark Brunei, di-Tutong.

Perwakilan mengenai kajian bumi sharikat tersebut, Awang R. Teipel berkata selepas 18 bulan menjalankan kerja2 menyelidik sharikat itu telah menghantarkan chatetan mengenai gegaran bumi itu ka-Amerika untuk di-proses semula.

Kerja2 ini akan dilakukan dengan menggunakan alat2 komputer bagi mendapatkan maklumat2 yang lebih baik.

Awang Teipel berkata, sharikat Jerman "PRAKLA" yang bekerja bagi pehak SUNRAY kerana menjalankan tugas2 seismograph itu telah menyelidik satu kawasan yang chukup untuk memberikan penilaian yang baik.

Pengorek2 akan di-hantar ke kawasan tersebut untuk mengorek telaga minyak, hanya selepas chatetan menge-

Mengesan pemborosan penggunaan ayer di-bandar orang ramai di-seru berkerjasama

BANDAR BRUNEI. — Persediaan2 bagi pelaksanaan projek mengesan pemborosan penggunaan ayer di-kawasan Bandar Brunei sedang berjalan dengan lancar-nya.

Sa-orang juruchakap Jabatan Kerja Raya berkata jurutera2 sekarang sedang mengkaji ranchangan2 pembahagian bekalan ayer di-kawasan Bandar Brunei sebelum di-pechahkan kapada daerah.

Juruchakap itu berkata, penyelidikan penggunaan bekalan ayer di-Bandar Brunei baru2 ini menunjukkan, bahawa sebahagian besar bekalan ayer telah terbuang.

Kejadian seperti itu tidak boleh di-biarkan kerana ia-nya akan memberi kesan kepada bekalan ayer dari kolam ayer Tasek.

Kolam tersebut di-bina ketika keperluan bekalan ayer pada masa itu tidak begitu besar tetapi dari sejak akhir2 ini keperluan ada-lah semakin

bertambah dan bekalan ayer simpanan mungkin tidak menchukopi, jika langkah2 tertentu tidak diambil untuk mengawal ayer dari terbuang.

Jabatan Kerja Raya menyertu mereka yang menggunakan ayer supaya tidak membazir dan memberikan kerjasama dengan jabatan bekalan ayer dengan chara melaporan berlaku-nya kebochoran paip ayer pecah dan jika melihat ayer terbuang. Kerana jika tidak demikian mungkin perlu di-kenakan chatuan bekalan ayer.

Laporan2 mengenai paip ayer pecah atau bochor boleh di-lakukan melalui talipon nombor 428, kapada kaki tangga setor bekalan ayer.

JAWATAN KOSONG:

SEBAGAI BIDAN PELAJAR

Permohonan2 ada-lah di-jemput dari chalon2 yang menjadi ra'ayat atau mereka yang berhak di-daftarkan sebagai ra'ayat D.Y.M.M. Al-Sultan di-lantek sebagai Bidan2 Pelajar di-Jabatan Perubatan dan Kesihatan, Brunei.

KELAYAKAN2:

Mesti-lah julus sekurang2-nya Darjah V Sekolah Melayu, atau kelayakan yang sebanding Melayu pasar.

Keutamaan akan di-beri kapada pemohon2 yang bersedia untuk pulang ka-kampung2 mereka untuk berkhidmat sebagai Bidan apabila mereka sudah mempunyai kelayakan.

Pemohon2 mesti-lah berumur sekurang-nya 20 tahun.

LATEHAN:

Chalon2 yang terpilih akan di-kehendaki menjalani satu latehan selama 2 tahun di-Sekolah Perbidanan, Rumah Sakit Besar, Bandar Brunei.

Setelah tamat tempoh latehan selama 6 bulan, bidan2 pelajar yang tidak menjalani kursus dengan memuaskan mungkin akan di-berhentikan.

Bidan2 Pelajar di-kehendaki lulus satu pepercayaan setelah tamat kursus latehan itu.

TUGAS SELEPAS LATEHAN:

Bidan2 yang telah lulus akan bertugas di-kampung2 ia-itu di-klinik2 khas.

TINGKATAN GAJI:

Bidan Pelajar — \$152/-sa-bulan.

Bidan (Terlateh) — \$200 x 10 — 270/EB/280 x 10 — 330.

Bidan (Staff Midwife) — \$380 x 20 — 480/EB/500 x 20 — 620.

Bidan2 Pelajar yang di-lantek di-bawah ranchangan ini ada-lah berhak mendapat pakaian seragam perchuma dan alaon dhobi.

Bidan2 terlateh ada-lah berhak di-naikan pangkat menjadi Bidan (Staff Midwives).

Permohonan2 yang mesti di-penohkan di atas borang2 yang boleh di-perolehi daripada Pegawai Perjawatan, Brunei, mesti-lah di-kembalikan kepada Setia Usaha Kerajaan, Brunei, tidak lewat daripada 31 Disember, 1967.

LIMA ORANG TAHANAN DI-BEBASKAN 1 JAN. '68

BUNUT. — Sa-ramai lima orang tahanan yang sekarang sedang menjalani kursus pemulehan semula di-Pusat Pemulehan Bunut di-jangka akan di-bebaskan pada 1 Januari tahun hadapan.

Pegawai Pemulehan, Awang, L. J. Brown memberitahu ba-



Pesurohjaya Kebajikan, Awang Salleh bin Haji Masri kelihatan sedang menyampaikan wang bantuan itu kapada Awang Junaidi bin OKSN, Md. Safar, Setia Agong Persatuan Melayu Kerima, Tutong.

2 buah persatuan lagi terima bantuan wang

BANDAR BRUNEI. — Pesurohjaya Kebajikan, Awang Salleh bin Haji Masri telah mendermakan wang sa-banyak \$300 tiap2 satu kapada dua buah persatuan belia kerana menulung melangkapkan rumah2 persatuan itu dengan alat perabut.

Persatuan2 tersebut ia-lah Persatuan Melayu Keriam di-Tutong dan PATUH di-Kampung Ayer.

Kedua2 persatuan itu layak menerima hadiah itu sa-telah mereka sendiri mengutip sa-banyak \$300 untuk sa-banding dengan sumbangan Jabatan Kebajikan itu.

Sharat2 bagi menerima bantuan itu, persatuan2 belia mesti-lah membina rumah2 berbentuk klab yang di-luluskan dan mengutip tidak lebih dari \$300 kerana kelangkapan alat perabut saperti meja, bangku dan cabinet.

Dalam bulan Oktober yang lalu dua buah persatuan belia telah menerima bantuan saperti itu. Persatuan2 itu ia-lah PERDA dan persatuan Sengkurong.

Satu usol di-luluskan dalam M.M.D. Tutong

DARI MUKA 3

Konsol itu tidak mengadakan persidangan-nya kerana tidak ada yang hendak di-mashuaratkan.

"Usol2 yang di-hadapkan oleh mereka yang sudah2, tujuan-nya ada-lah sama saperti yang di-hadapkan d a l a m Majlis Mashuarat Daerah dan Majlis Mashuarat Penghulu2 dan Ketua2 Kampung".

Jawapan Kerajaan itu sa-tebus-nya menjelaskan bahawa badan tersebut sudah tentu pada orang ramai jika mengikut tujuan2 yang sa-benarnya dan kerana itu badan tersebut tidak akan di-bubarkan.

Yang Berhormat Awang Md. Zain telah juga menge-mukakan satu usol dalam majlis itu yang kemudian-nya telah di-luluskan.

Usol itu ia-lah untuk men-gambil keputusan majlis bagi menasihati Pegawai Daerah supaya Kerajaan d a p a t dengan segera-nya mengada-kan perabut2 untuk Balai2 Raya di-Daerah Tutong.

Persidangan itu telah di-pengerusikan oleh Pegawai Daerah Tutong, Pengiran Othman bin Pengiran Anak Mohammad Salleh.

hawa pembebasan mereka ada-lah bergantong kapada tamat-nya kursus pemulehan di-pusat itu.

Sa-takat ini sa-ramai 1,684 orang tahanan telah di-bebas-kan.

Awang Brown berkata, ke-banyakkan dari 1,684 orang bekas tahanan itu ada-lah

gembira dengan kehidupan baru mereka dan membuat pekerjaan sendiri atau kembali memegang pekerjaan mereka yang lama.

Beliau berkata, bekas orang tahanan ada-lah berkelakuan baik dan di-terima kembali ka-dalam masharakat.

AHLI2 MAJLIS MASHUARAT DAERAH TUTONG DI-INGATKAN KETAHUI SEMPADAN YANG DI-BOLEHKAN KETIKA MENGEMUKAKAN USOL2



PG. OTHMAN

TUTONG. — Pegawai Daerah Tutong, Pengiran Othman bin Pengiran Anak Mohammad Salleh telah menyertai ahli2 supaya memberi nasihat yang berguna kapada penduduk2 di-daerah itu pada memberikan kerjasama terutama mengenai rancangan2 Kerajaan yang sentiasa di-usahakan pada tiap2 masa mengikut giliran yang tertentu.

Ahli2 majlis hendak-lah memberikan nasihat2 itu kepada penduduk2 kampong salain dari usaha mereka yang tertentu ia-itu membawa usol2 dan mengemukakan pertanyaan2 dalam persidangan majlis.

Seruan itu telah di-buat beliau dalam persidangan akhir Majlis Mashuarat Daerah Tutong bagi tahun 1967 yang telah berlangsung di-Bilek Persidangan Pejabat Daerah Tutong pada hari Khamis, 7 Disember lepas.

Pengiran Othman juga telah mengingatkan ahli2 majlis tersebut supaya mengkaji sedalam2nya sa-belum mengemukakan sesuatu usol yang hendak di-bawa mereka kembali dalam persidangan.

Pegawai Daerah itu menekankan bahawa kajian awal ada-lah perlu supaya usol2 yang hendak di-kemukakan itu tidak akan mendatangkan kerugian sama ada pada penduduk2 di-daerah itu atau pun kepada Kerajaan.

"Ahli2 majlis hendak-lah mengetahui sempadan2 yang mereka di-bolehkan membawa sesuatu usol atau soalan2 sabagaimana terdapat dalam Peraturan2 Tetap Majlis tersebut," tegas Pengiran Othman.

Beliau berharap supaya ahli2 majlis itu akan sentiasa patoh dan taat setia kapada Kerajaan Duli Yang Maha Mulia dan mengharapkan agar tahun 1968 yang akan datang ini akan membawa pemandangan2 yang baik dan berfaedah demi untuk kemajuan dan kemakmoran negara.

Terdahulu dari itu, Pengiran Othman telah menyatakan tentang kemajuan2 yang telah di-chapai dari usol2 yang telah di-luluskan majlis sejak persidangan Majlis Mashuarat Daerah Tutong itu di-adakan.

Kata-nya, ahli2 majlis ini telah menghadapkan beberapa soalan2 dan usol2 yang difikirkan mendarangkan munafah terutama sekali kapada penduduk2 daerah itu dan penduduk2 seluruh negeri.

Beliau menegaskan bahawa usol2 yang telah di-hadapkan itu telah pun di-ambil tindakan yang memuaskan oleh Kerajaan.

Pengiran Othman telah menyebut beberapa chadangan yang dibuat dalam majlis itu dan telah pun di-layan Kerajaan dengan sewajar-nya, antara-nya termasuklah:

- * Mengadakan doktor bagi mengawal kesihatan penduduk2 daerah itu;
- * Mengadakan kereta2 ambulance untuk membawa orang2 sakit dan membawa pegawai2 perubatan untuk mengadakan lawatan ka-kampong2;
- * Mengadakan Pejabat Imigresen; dan

* Mengadakan Pejabat Buroh.

Selain dari itu, Pengiran Othman juga telah menyatakan bahawa Kerajaan baru2 ini telah pun memasang radio talipon di-kampong2 pendalaman daerah itu seperti di-Kampong Benutan, Kam-

pong Rambai, Kampong Bukit dan kampong2 yang lain yang difikirkan berpatutan di-adakan radio talipon itu.

"Jalan2 kecil yang tidak ku-rang mustahak-nya ada-lah sentiasa di-baiki saperti membubuh batu, di-timbok dengan tanah di-pasang kalbat dan di-buatkan jambatan serta memberi peluang kepada orang2 kampong untuk bekerja bagi menjaga jalan2 kecil itu," jelas beliau.

Di-bidang kemajuan pelajaran pula, Pegawai Daerah Tutong itu menyatakan bahawa Kerajaan telah pun mendirikan dan menambah beberapa buah sekolah di-Daerah Tutong untuk mengatasi kesulitan2 pelajaran anak2 di-dae-rat itu.

Berchakap mengenai perbekalan ayer pula, Pengiran Othman menjelaskan bahawa dalam projek-nya yang besar, Kerajaan telah mengarahan pakar2 untuk menjalankan penyiasatan supaya bekalan ayer dapat di-bekalkan kapada semua penduduk2 daerah itu dengan sempurna.

Pengiran Othman telah juga menyebut mengenai jalan2 raya di-daerah itu terutama yang akan menghubungkan kampong2 penda-laman dengan kawasan bandaran.

Jalan Lamunin, kata-nya, se-dang di-perbaiki dan di-bubuh pit supaya dapat di-gunakan pada tiap2 masa oleh penduduk2 di-kampong2 yang ada di-sepanjang jalan raya itu dan bagitu juga dengan jalan raya Penanjong, yang sedang di-usahakan untuk di-perbaiki.

Mengenai perkhidmatan doktor gigi yang telah terhenti di-daerah itu, beliau menyatakan bahawa perkhidmatan itu telah di-adakan kembali.

Menyebut mengenai Balai2 Ra-ya yang telah di-bina di-kampong2 dalam Daerah itu, beliau menyatakan bahawa usaha untuk melengkapkan balai2 raya itu dengan jambatan2 yang sesuai telah pun di-lakukan di-beberapa buah balai raya dan banyak lagi jambatan2 yang serupa akan di-bina di-balai2 raya yang berpatutan.

Pegawai Daerah itu telah menyakinkan ahli2 majlis dengan menyebutkan:

"Banyak lagi tindakan2 yang di-ambil oleh Kerajaan sa-bagai menyahut seruan2 penduduk2 di-daerah itu khas-nya dan seluruh penduduk2 di-negeri ini dapat negeri Brunei agar taraf kehidupan lagi di-tinggikan".


Waktu2 Sembahyang, Imsak dan Matahari Terbit

Waktu2 sembahyang, imsak dan matahari terbit bagi Daerah2 Brunei/Muara, Tutong dan Temburong mulai dari hari Rabu 13 Disember, 1967, hingga ka-hari Selasa 18 Disember, 1967 ada-lah saperti di-bawah ini—

Hari Bulan	Dzohor	Asar	Magrib	Isha	Imsak	Suboh	Matahari Terbit
13 Dis.	12-20	3-39	6-16	7-30	4-46	5-01	6-19
14 Dis.	12-20	3-39	6-16	7-30	4-46	5-01	6-19
15 Dis.	12-20	3-39	6-16	7-30	4-46	5-01	6-19
16 Dis.	12-23	3-42	6-18	7-33	4-49	5-04	6-22
17 Dis.	12-23	3-42	6-18	7-33	4-49	5-04	6-22
18 Dis.	12-23	3-42	6-18	7-33	4-49	5-04	6-22
19 Dis.	12-23	3-42	6-18	7-33	4-49	5-04	6-22

Waktu sembahyang dan imsak bagi Daerah Belait hendak-lah di-tambah tiga minit pada tiap2 waktu. Sembahyang Juma'at di-seluruh Negeri Brunei di-mulai pada pukol 12-45 tengah hari.

SI·TUYU



\$189 juta belanjawan tahun 1968

Peruntukan kemajuan paling besar

BANDAR BRUNEI. — Brunei sedang membuat anggaran Belanjawan sa-banyak \$189,431,399 bagi peruntukan tahun depan.

Anggaran belanjawan tersebut ada-lah tercatat dalam Rang Undang2 Perbekalan bagi tahun 1968 yang telah dikemukakan dalam persidangan hari pertama 11 Disember lepas dan telah di-kemukakan oleh Yang Berhormat, Pegawai Kewangan Negara, Dato Setia Awang John Lee.

Dalam Rang Undang2 itu, peruntukan yang terbesar sekali ia-lah berjumlah \$58,500,000 kerana kemajuan negara dan \$24,077,750 kerana perkhidmatan rampaian.

Dari 42 perkara yang lainnya dalam jadual peruntukan itu sa-jumlah \$19,917,487 di-peruntukan bagi Pasukan Askar Melayu Di-Raja Brunei; Pelajaran sa-banyak \$16,761,845 dan Kerja Raya sa-jumlah \$13,886,742.

Perubatan di - peruntukan sa-banyak \$7,978,365; Hal-Ehwal Ugama mempunyai peruntukan sa-banyak \$6,007,230; peruntukan untuk perkhidmatan Pulis berjumlah \$5,788,607; Pejabat2 Daerah dan Tanah \$4,207,210; Elektrik \$4,984,285; Bandaran sa-

Peruntukan A.M.D.B. hampir \$20 juta

banyak \$3,070,737; Pertanian \$2,901,550; dan Talikom \$2,521,230.

Lain2 perkhidmatan ia-lah mempunyai peruntukan sa-banyak satu juta ringgit kawawah.

Pehak Kerajaan telah menganggarkan pendapatan hasil bagi tahun 1968 sa-jumlah \$157,973,720.

Sumber2 utama dari pendapatan itu ia-lah sa-jumlah \$68,455,000 dari chukai pendapatan; Faedah dari penan-

man modal sa-banyak \$45,860,000; dan chabutan hasil sewa dan sa-bagai-nya sa-jumlah \$29,643,000.

Ranchangan bekalan letrik yang besar yang baru siap dijangka menambahkan pendapatan Jabatan Letrik kapada \$2,846,000 pada tahun depan. Lain2 pendapatan yang besar ia-lah Kastam dan Exsais sa-banyak tujuh juta dan Talikom sajumlah satu juta dan dua ratus ribu ringgit.

Persidangan belanjawan akan berlangsung sa-lama beberapa hari dan sa-lain dari mengenai belanjawan, Ahli2 Yang Berhormat akan membincangkan beberapa Rang Undang2 yang di-bentangkan.

Ahli2 majlis juga akan mendebatkan shor2 yang di-kemukakan oleh ahli2 yang di-pileh dan ahli2 yang di-pileh juga di-beri notis untuk beruchap berikut dengan penganggahan Majlis Mashuarat itu.

Nasihat Pulis kapada orang yang mempunyai peti besi

BANDAR BRUNEI. — Pehak Pulis telah menyeru orang2 yang mempunyai peti besi supaya melekatkan peti besi itu di-tempatnya dengan semen untuk menchengah ia dari di-bawa lari oleh penchuri.

Nasihat2 itu di-buat berikutan berlaku-nya kechurian2 baharu2 ini dalam mana peti besi telah di-churi dan di-gelida.

Pulis juga menasihat tuan2 punya besi yang mutu-nya kurang baik supaya menggantikan-nya dengan yang lebih baik.

Sa-orang juruchakap pulis berkata kebanyakkan peti besi yang telah di-rompak isi-nya dalam beberapa bulan baharu2 ini ada-lah jenis yang kurang baik dan dapat di-pechah dengan kapak.



Duli Yang Maha Mulia Paduka Seri Sultan sedang memereksa barisan kehormatan yang terdiri dari anggota2 Pulis Di-Raja Brunei dalam upacara pembukaan sidang Majlis Mashuarat Negeri.

D.Y.M.M. gembira dgn. kemajuan negara

DARI MUKA 1

“Beta yakin bahawa ahli2 Yang Berhormat akan memberi sokongan penuh mereka kepada chadangan2 Kerajaan yang bertujuan bagi melaksanakan laila usaha untuk mendatangkan munafaat kepada Negara Brunei bagi raayat dan isi dalam-nya,” titah Baginda.

Akhir-nya Baginda mengucapkan mogak ahli2 majlis itu akan dapat mencapai kejayaan laila penyelesaian dalam penetapan2 mereka di-sidang Belanjawan tersebut.

Baginda berharap bahawa apa yang di-putuskan dalam persidangan itu akan dapat memberi sumbangan yang munasabah untuk kesejahteraan dan kebajikan raayat dan penduduk Negara Brunei Darus Salam yang kita kasehi.

Terdahulu dari itu, Baginda telah menerima tabek kehormatan Di-Raja dan memereksa perbarisan kehormatan yang terdiri dari pasukan Pulis Di-Raja Brunei dan Pancharagam Pulis Di-Raja Brunei yang telah di-langsungkan di-kawasan Dewan Kemasharakat.

**DYMM Paduka
Seri Sultan
pertama kali
bertitah dlm.
M.M. Negeri**

BANDAR BRUNEI. — Sidang Majlis Mashuarat Negeri buat pertama kali-nya telah mendengar titah uchapan Duli Yang Maha Mulia Paduka Seri Sultan dari sejak Baginda naik takhta Kerajaan.

Baginda berangkat tiba di Dewan Kemasharakat, Bandar Brunei sejurus sa-lepas pukul 10.00 pagi dan di-berikan tabek kehormatan Di-Raja oleh Pasukan Pulis Di-Raja Brunei dengan di-iringi oleh Pancharagam Pulis Di-Raja.

Baginda juga telah memerlukan barisan kehormatan dan sa-baik2 saja Baginda tiba telah di-sambut oleh Dato Speaker, Yang Berhormat Pehin Dato Perdana Menteri, Dato Seri Utama Awang Haji Ibrahim bin Mohammad Jahfar yang kemudian-nya mengenalkan Baginda kapada Ahli2 Yang Berhormat.

Yang Berhormat Dato Speaker kemudian-nya mengiringi Baginda ka-Singgahsana kerana memberikan titah uchapan.

Pembukaan sidang belanjawan itu di-hadiri oleh Pembesar2 Negara, Ketua2 Jabatan dan Pemerhati2.

Antara yang hadir termasuk-lah Duli Yang Teramat Mulia Paduka Seri Begawan dan Yang Teramat Mulia Duli2 Wazir.

HARI KELEPASAN AWAM

BANDAR BRUNEI. — Nuzul Al-Kor'an akan di-peringati dengan suatu hari kelepasan awam.

Ulang tahun yang ka-1,400 tahun Nuzul Al-Ko'r-an jatoh pada hari Selesa, 19 Disember, 1967.

Hari itu telah di-umumkan sebagai hari kelepasan awam di-seluruh Negeri Brunei.